



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მონასპა

მონასპა, სამეფო გვარდია ფეოდალურ საქართველოში. დააარსა დავით IV აღმაშენებელმა. მ-ში 5000 მხედარი „მონა“, ანუ მეფის პირად სამსახურში მყოფი რჩეული პროფესიონალი მეომარი შედიოდა. **მ.** მეფის მცველი კორპუსი იყო და ხშირად საგარეო მტრების წინააღმდეგ საპასუხისმგებლო სამხედრო ოპერაციებსაც ატარებდა. **მ**-ში შედიოდნენ სხვადასხვა ეროვნებისა და სარწმუნოების მოლაშქრეები, ძირითადად, როგორც ჩანს, ქართველი და ჩრდ. კავკასიის მთიელები და თურქთა შემოსევების გამო უმამულოდ დარჩენილი აღმ. საქართველოს ფეოდალები. არაქრისტიან „მონათა“ დიდი უმრავლესობა თანდათან გაქრისტიანდა. მოლაშქრეები მუდამ მეფესთან ან სასახლესთან იმყოფებოდნენ და მეფის წყალობით ცხოვრობდნენ. დავით აღმაშენებელი დიდად აფასებდა „მონებს“, რ-ებიც მისი ხელისუფლების ძირითად დასაყრდენს წარმოადგენდნენ ფეოდ. ოპოზიციასთან ბრძოლაში. **მ.** არსებობდა დავით აღმაშენებლის მემკვიდრეთა დროსაც. **მ**-ის მოლაშქრეები, ცხადია, მონები არ იყვნენ (ამ სიტყვის ჩვეულებრივი მნიშვნელობით), მაგრამ არ ჰქონდათ სოც. თავისუფლება, იყვნენ მეფის ყმები. XII ს. განმავლობაში „მონათა“ უმრავლესობა ყმა-მამულით იქნა შეწყალებული და ქართველ ფეოდალთა რიგებს შეერია. 1184 შემდეგ **მ.** აღარ იხსენიება. **მ**-ის მოლაშქრეთაგან იყვნენ გამოსული გიორგი III-ისა და თამარის დროს მაღალ სახელმწ. თანამდებობაზე დანიშნულებული „უგვარო“ მოხელეები: მხარგრძელები, ყუბასარი, აფრიდონი და სხვ. **მ.** გამოცდილი და სანდო მეომრებისაგან შედგებოდა, იყო უაღრესად მობილური და საქართვე. სამხ. წარმატებებში დიდი როლი შეასრულა.

ლიტ.: ა ნ თ ე ლ ა ვ ა ი., საქართველოს საისტორიო წყაროთმცოდნეობითი ძიებანი, თბ., 2002; ბ ა რ ა მ ი ძ ე ა., შოთა რუსთველი და მისი პოემა, თბ., 1966; ბ ე რ ძ ე ნ ი შ ვ ი ლ ი ნ., საქართველოს ისტორიის საკითხები, წგ. 7, თბ., 1974; ჩ ხ ა ტ ა რ ა ი შ ვ ი ლ ი ქ., უცხოელები XII საუკუნის საქართველოს ლაშქარში, კრ.:

საქართველო რუსთაველის ხანაში, თბ., 1966; წ უ რ წ უ მ ი ა მ., საქართველოს
სამხედრო ისტორიის საკითხები, თბ., 2013.

ქ. ჩხატარაიშვილი
